


寧雅堂藏書

奧雅堂叢書

文館詞林



文館詞林卷六百六十二

中書令太子賓客監脩國史宏文館學士上柱國高
陽郡開國公臣許敬宗奉 敕撰

詔州二

征伐上

太宗文皇帝伐遼手詔一首

漢武帝欲伐匈奴詔一首

答淮南王諫伐越詔一首

魏文帝論伐吳詔二首

魏常道鄉公伐蜀詔一首

西晉武帝伐吳詔一首

答杜預征吳節度詔一首

東晉明帝北伐詔一首

東晉成帝北討詔一首

東晉安帝征劉毅詔一首

後魏孝文帝戒師詔一首

出師詔一首

後魏節閔帝伐爾朱文暢等詔一首

後魏孝靜帝伐元神和等詔一首

宋順帝西討詔一首

南齊明帝北伐纂嚴詔一首

梁武帝北伐詔一首

又北伐詔一首

北齊文宣帝征長安詔一首

西伐詔一首

後周武帝伐北齊詔一首

太宗文皇帝伐遼手詔一首

門下行師用兵古之常道取亂侮亡先哲所貴高麗莫
離支蓋蘇文弑逆其主酷害其臣竊據邊隅肆其蜂蠆
朕以君臣之義情何可忍若不誅翦遐穢無以懲肅中
華今故欲巡幸幽并問罪遼碣行止之宜務存節儉所
過營頓無勞精飾食唯充飢不須珍膳水可涉渡者無
假造橋道路通行者不用脩理御營非近州縣學生老
人等無煩迎謁恐致勞擾弊於往來昔隋室淪亡其源
可覩良由智略乖於遠圖兵士疲於屢戰政令失度上
下離心德澤不加於匹夫刻薄彌窮於萬姓當此時也

高麗之主仁愛其□仰之如父母煬帝殘暴其衆故衆
視之如仇讐以思亂之軍擊樂安之卒務其功也不亦
難乎何□入水而惡其濡踐雪而求其跡朕緬懷前載
撫躬內省昔受鉞專征提戈撥亂師有經年之舉食無
盈月之儲軍乏餘資朝不供夕至於賞罰之信尙非自
決於心然猶所向風靡前無橫陳蕩氛霧於五岳翦豺
狼於九野定海內拯蒼生使萎霜之草復含翠色將朽
之骨重反豐肌然則行軍用兵之事皆億兆之所親見
豈虛言哉及至端拱巖廊定策帷展身處九重之內謀

決萬里之外北殄匈奴種落有若摧枯西滅吐谷渾高
昌易於拾芥苞絕漢而爲苑跨流沙以爲池黃帝不服
之口唐堯不臣之域並皆委質奉貢歸風順軌然則崇
威啓化之道此亦天下所共聞也况今豐稔多年家給
人足餘糧栖畝積粟紅倉雖足以爲兵儲猶恐勞於轉
運故多驅牛羊以充軍食人無裹糧之費衆有隨身之
稟如斯之事豈不優於曩日加以躬先七萃親決六奇
使攻無所守戰無所拒畧言其數必勝之道蓋有五焉
一曰以我大而擊其小二曰以我順而討其逆三曰以

我治而乘其亂四曰以我逸而敵其勞五曰以我悅而當其怨何憂不剋何慮不摧可使布告元元勿爲疑懼耳

漢武帝欲伐匈奴詔一首

制詔朕飾子女以配單于金幣文繡賂之甚厚單于待命加嫚侵盜無已邊境被害朕甚閔之今欲舉兵攻之何如

答淮南王安諫伐越詔一首

皇帝問淮南王使中大夫王上書言事聞之上奉先帝

之休德夙興夜寐明不能燭重以不德是以比年凶災
害衆夫以渺渺之身託于王侯之上內有飢寒之人南
夷相攘使邊騷然不安朕甚懼焉今王深惟重慮明太
平以弼朕失稱三代至盛統天接地人迹所及咸盡賓
服藐然甚慚嘉王之意靡有所終使中大夫助論朕意
告王越事

魏文帝論伐吳詔二首

制詔昔軒轅不爲涿鹿之師則蚩尤之妖不滅唐堯不
興丹水之陳則南蠻之難不平漢武不行呂嘉之罰則

橫浦之表不附光武不加讞述之誅則隴蜀之亂不清
故曰非威不服非兵不定孫權小醜憑江悖暴因有外
心凶頑其性故奮武銳順天行誅驍騎龍驤猛將武步
或脩句踐潛涉之口頑或同韓信夏口之誑愚接橫船
以水攻陳六軍以陸擊征南進運以圍江陵多獲舟船
斬首執俘降者盈路牛酒日至大司馬及征東諸將卷
甲長驅其舟隊今已可濟今車駕自東爲之瞻鎮雲行
天步乘輿而進賊進退道迫首尾有難不爲楚靈乾溪
之潰將有彭寵蕭牆之變必自魚爛不復血刃宜慎終

節動靜以聞

制詔若軒轅建四面之號周武稱子有亂十人斯蓋先
聖所以體國君人亮成天工多賢爲貴也今內有公卿
以鎮京師外設牧伯以監四方至於元戎出征則軍中
宜有柱石之賢帥輜重所在又宜有鎮守之重臣然後
車駕可以周行天下無內外之慮吾今當征賊欲守之
積年其以尙書令潁鄉侯陳羣爲鎮軍大將軍尙書僕
射西鄉侯司馬懿爲撫軍大將軍若吾臨江授諸將方
畧則撫軍當留許昌督後諸軍錄後臺文書事鎮軍隨

車駕當董督行尙書事皆假節鼓吹給中軍兵騎六百人吾欲去江數里築宮室往來其中見賊可擊之形便出奇擊之若或未可則當紆六軍以遊獵饗賜軍士

魏常道鄉公伐蜀詔一首

制詔蜀葛爾小國土狹人寡而姜維虐用其衆曾無廢志往歲破敗之後猶復耕種沓中刻剝衆羌勞役無已人不堪命夫兼弱攻昧武之善經致人而不致於人兵家之上畧蜀所恃賴唯維而已因其遠離巢窟用力爲易今使征西將軍鄧艾督率諸軍趨甘松沓中以羅取

維雍州刺史諸葛緒督軍趨武街高樓首尾蹙討若禽
維便當東西並進掃滅巴蜀也

西晉武帝伐吳詔一首

制詔兵興以來八十餘年戎車出征罔有甯歲死亡流
離傷害和氣朕每惻然悼心思戢兵靜役與人休息故
罷習業廣分休假大遣扶老養孤及女朝夕相對而吳
賊失信北犯王畧胡虜剽狡寇害邊垂人兵缺少不足
禽制輒當前休中土以相應赴將士疲瘁而猶不及事
欲以爲靜而更爲勞昔淮夷不賓成王東伐獫狁作難

戎車夏征自古及今咸皆勤戎遠戍先勞後逸未有得脩無爲於有事之時也自宣皇帝以來每以吳蜀爲憂邊事爲念今孫皓犯境夷虜擾邊此乃祖考之遺慮朕身之大恥也故繕甲脩兵大興戎政內外勞心上下戮力以南夷句吳北滅戎狄然后得休牛放馬與天下共饗無爲之福耳今調諸士家有二丁三丁取一人四丁取二人六丁以上三人限年十七以上至五十以還先取有妻息者其武勇散將家亦取如此隨才署武勇掾吏樂市馬比爲騎者署都尉司馬中閒以來內外懈弛